

di cremaseo, è stà visto in aere serpi ignei, i qual diseseno et brusorono una caxa con tuto quello era dentro, et non è stà ritrovato pur uno pezo di piera, nè altra cossa in quella existente. Penso et judico, siamo a le fine dil seculo, *licet mors sit finis sæculi etc.*

Et Jo, Marin Sanudo, nulla vi credo; ma sia vero, o bel trovar ne ho voluto far qui notte.

128

*Dil mæxe di zugno 1502.*

*A dì do.* Intendendo la Signoria nostra, che il re di Franza veniva a Milan, per honorar soa maestà fo posto parte, di elezer do solenni ambascadori; et cussì fonno electi sier Antonio Loredan, el cavalier, fo savio dil conseio, e sier Marco Sanudo, fo savio dil conseio, *quondam* sier Francesco. Fu soto sier Zorzi Corner, el cavalier, fo capetanio a Verona; e il scurtinio sarà posto qui avanti. I qualli, per invalidudine di la persona, refudono tal cargo, et fo acceptà per il conseio di pregadi. Et in l'hor locho fo preso parte, acciò la cossa fusse più presta, che 'l fusse balotato li rectori di le cità, et di quelli, do ne havessero a remaner, con li ducati 150 al mæxe, neti, per le spexe; et rimaseno sier Andrea Venier, capetanio a Padoa, *quondam* sier Lion, et sier Bernardo Bembo, dottor et cavalier, podestà di Verona. Et il Venier se excusoe; et fu preso in pregadi, che el ditto sier Bernardo andasse lui sollo con 20 cavali e havesse ducati 250 al mæxe, et cussì acceptò e andò a dì 15.

Ancora fu fato scurtinio di uno provedador in Albania, et fonno tolto assai; balotadi, niun non passò.

*Item*, fu preso parte, di dar el buzintoro a la raina di Hongaria, vien di Franza, e li vadi contra il principe con il coleio, avogadori, cai di X, e fioli dil serenissimo e donne e non altri, et farli presentie di ducati 50 al zorno; ma non (*sic*) fo dà assa' più.

*A dì 7.* In pregadi. Sier Marco Sanudo andò in renga, comemorando suo padre e suo barba, misier Lunardo, mio padre, esser morti a' servicij di la republica, e cussì voleva far lui, ma che l'era mal sanno, beveva aqua *etc.*; e il compagno eletto, sier Antonio Loredan, era in leto amalato, però si excusava. E fu posto, per i consieri, acetar l'hor scuse. Ave 57 di no, 120 di sì; e fo preso balotar i rectori, con pena di ducati 500, oltra tute altre pene *etc.*

*Electi do oratori a Milan, contra il re.*

Rimasto † Sier Andrea Venier, capetanio a Padoa, *quondam* sier Lion, . . . 92

Sier Thomà Mozenigo, podestà di Padoa, *quondam* sier Nicolò, procurator, . . . 32

Sier Zuan Mozenigo, capetanio a Verona, *quondam* sier Piero, . . . 16

Rimasto † Sier Bernardo Bembo, dottor, cavalier, podestà a Verona, . . . 122

Sier Domenego Bolani, capetanio a Cremona, *quondam* sier Francesco, . . . 42

Sier Polo Pixani, el cavalier, podestà a Cremona, *quondam* sier Luca, . . . 52

Sier Marco da Molin, capetanio a Brexa, *quondam* sier Polo, . . . 13

Sier Piero Capelo, podestà a Brexa, *quondam* sier Zuan, procurator, . . . 42

Sier Hironimo Bembo, capetanio a Bergamo, *quondam* sier Piero, . . . 12

Sier Domenego Contarini, podestà a Bergamo, *quondam* sier Maffio, . . . 57

Sier Bernardo Donado, capetanio a Vicenza, *quondam* sier Piero, . . . 12

Sier Andrea Trivixan, el cavalier, podestà a Brexa, . . . 32

*A dì 9 zugno.* Se intese, Vitelozo Vitelli, capetanio dil ducha Valentino, haver tolto a' fiorentini Arezo et Pistoia e Voltera, e vol meter Piero di Medici in caxa; sì che in Toschana quelle cosse sono in combustione.

*Da Roma.* El papa disse in concistorio, voler andar a Ferrara *cum tota curia, excepto* la Rota; e questo, passato la festa di San Piero. E fo suspicato andava per abocharsi col re di Franza, vien a Milan. Et za li nostri do oratori a presso il re di Franza si ha, dil suo zonzar a Lion avanti il re; et di certo questo luio il re sarà a Milan, a la più longa. Et la raina, va in Hongaria, fia di monsignor di Candala, vien *etiam* lei a Milan, poi verà in questa terra, per passar in Hongaria. La venuta di la qual darà spexa a la terra di ducati 20 milia; e andará in Hongaria o per via di Segna o di Treviso.

Fo in pregadi electo, a dì 16, orator in Franza, in locho di quelli do vi sono, sier Marco Dandolo, doctor et cavalier, qual renontìo a Roma, et questa acceptò; e fo eletto con pena.

*Item*, è stà mandato a Segna, per Francesco da la Zudecha, secretario nostro, ducati 33 milia 333, con una galia armada per il papa; et questo per la quarta paga va al re di Hongaria, per li ducati 100 milia se li dà a l'anno.